

Préch'mint du 23^e dim B. Spiennes.

Abbé Michel Van Herck

- Vous avez bé entendu, Mariette ? Il in a à avoir l'choune¹ dè daller à messe ! Ca spitte d'tous les costés ! Tu n'sais niè daller t'mucher² pou niè in atrapper ! L'Bon Dieu est co pus pire qu'el ropieur qui spitte³ de l'ieau su les geins dins l'gardin du mayeur, à Mons.

« *N'ayez niè l'choune ! L'Bon Dieu viet s'arvinger*⁴ » etti l'prophète Esaïe. J'n'in n'ai jamée intindu enne pareye. V'là qu'el' Bon Dieu s'prind pou ein djadiste ! I l'artrousse ses manches pou s'arvinger. Est-ce qu'i n'a niè co assez d'malheurs su l'terre pou qu'il in remette co enne couche ?

Après ça, c'est s'n'apôte sint Jacques qui nos arloche⁵, eie niè avé l'dos d'el cuyère !

- Mais, Zandrine, est-ce què t'a biè ascouté ? L'Bon Dieu n'veut niè s'arvinger comme mi, comme ti ou comm'el sotte dè Lalie...

Ah, ouais ! J'ar'pinse à ça tout met'nant. Tu sais bè : l'grosse Lalie avè ses ies comm' des bouquiaux d'sorcière⁶ éié qu'à toudis l'langue comm' enne lavette au cul d'ein pot⁷. L'aute jour, c'étoit t'tour : elle t'a co noirci in racontant qu'étoit amoureuse d' Jujules ! J'l'ai intindu d'mes propes oreyes ! J' t' l' jures su l'tiète du Bon Dieu !

- Adons, Mariette, tu f'rois mieux dè t'taire avec ! Asteurs, tout l'villache l'saura !
- Ouais, t'as réson : c'qu'on n'sait niè, n'fée niè d'mau ! I vaut branmint mieux qu'nous acoutions dins no cœur les prééchmints du Bon Dieu, éiè d'canger d'quemin.
- J'té l'disois, Zandrine. L'Bon Dieu s'arvinche pou qu'les macaveuges⁸ artournent-tè leus ies, qu' les sourds ouvent-tè leus oreyes éié qu'les hingue-pinques n'châlent pus⁹. S'vingéson-là , el te rinds fin hûreux.
- Ouais. Mais mi, j'ai quand mein.me el choune ! Pa's qu'el Bon Dieu, ça fait co pus d'deux mille ans qu'il a v'nu sù no terre. Asteurs, i n'est pus etci. C't'à nos autes à r'tourner nos manches pou ouvrir in f'sant enne milette meyeu d'main qu'ahier. Ainsi, l'Bon Dieu nos voira dins l'ieau qu'i s'lave.
- Ouais, Mariette, i nos faut canger d'vie. « El cat est dins dins l'pindule ¹⁰ » etti l'pape François, dins s'nencyclique « Laudato si », « i faut r'bâti l'méeson commune¹¹ » :
 - o I'l' a tous les Africains qui vièt'té in Europe pass qu'i n'ont niè enne feuye à chucher¹² ;

¹ peur

² cacher

³ arroser

⁴ Se venger

⁵ secouer

⁶ Comme des galets lisses

⁷ Qui n'arrête pas de parler

⁸ aveugles

⁹ Boiteux qui boîtent

¹⁰ Il y a urgence

¹¹ Expression du pape

¹² Rien à manger

- I'l' a les Iraquiens éiè co branmint d's autes qu'on a r'wé à l'huche d'leu méeson come des brins d'estrons su n'palète¹³...
- I'l' a les ciens qu'ont enne figure blanque comme ein naviau pelé trois caups, pass qui sont escouftés des salop'ries nucléaires¹⁴ ;
- I'l' a les ciens qui qui sont malades, pass'qui doivent-tè boire de l'ieau qu'tu n'voudrais nié pou r'nettier tes artoiles¹⁵ ;
- I'l'a les infants qui ouvent à pieds descaux dins les monciaux ¹⁶des grandes villes en Inde ou en Amérique Latine, pou trouver enne saquè à mingier ;

Eié l'zitanie est co bé pus longue : i t'faut lire elle lette du pape. El pus pire, c'est qu'on baye toudis des nougettes aux ciens qui n'ont pus d'dints !

- I m'chenne, Zandrine, qu'nous pouvons toudis qu'mincher etci. Mons pourroit d'veni' l'capitale culturelle du monde intier in ouvrant s'cœur à tous les malheureux qui sonnent à l'porte dè no pays.
 - Il a chinquante années d'etc, quand j'dallois à Paris pou vîre em'monoque, j'étois tout paf d'incontrer des clochards. Eié asteurs, t'in vois dins toutes les rues d'no trau d'ville.
 - Est-ce que tu sais bè qu'à Mons, i l'a ein hotel social du CPAS pou loger des SDF, éié qu'des chrétiens ont rabistoqués des méesons pou les ciens qui n'ont niè branmint d'z'auberts¹⁷, à l'rue d'Bertaimont, à l'rue d'Havré et à l'place Beaudouin d'Constantinople. C'est l'Foyer Saint Augustin , eéi l'Méeson Internationale qui ouvent-tè là d'dins. Eié, assuré, il a l'Méeson Saint-Paul pou les hommes tous seus.
 - Est-ce que tu sais bè qu'à Mons, i l'a l'Resto du cœur, mais ossi qu'on baye à mingier à les ciens qui n'ont niè d'bons claus à leu coffe¹⁸. Eéié qu'on a ouvri enne épicerie sociale : c't'à l'rue d'Bertaimont, au Foyer Saint-Augustin.
 - Tu peux toudis ouver avè tous les bénévoles, ou bé leus bayer tes auberts¹⁹ pou continuer leu n'ouvrache.
- V'là l'arvinche pou ti éié pou nous autes tertousses. Amen !

¹³ Chasser de chez eux comme du crottin sur une pelle

¹⁴ Ils sont pâles parce qu'ils ont avalé des déchets nucléaires

¹⁵ De l'eau que tu n'utiliserais pas pour laver tes pieds

¹⁶ À pieds nus dans les ordures

¹⁷ Peu d'argent

¹⁸ Qui ne sont pas riches

¹⁹ Ton argent